



Na osnovu člana 8. Statuta Federalnog zavoda za zapošljavanje, a u skladu sa članom 7. stav 2. Zakona o budžetima u Federaciji Bosne i Hercegovine („Službene novine Federacije BiH”, br. 102/13, 9/14 i 13/14), Upravni odbor Federalnog zavoda za zapošljavanje na sjednici održanoj 12.10.2015. godine donosi

**O D L U K U**  
**O IZVRŠAVANJU FINANSIJSKOG PLANA**  
**FEDERALNOG ZAVODA ZA ZAPOŠLJAVANJE ZA 2016. GODINU**

**I – Opće odredbe**

**Član 1.**

Ovom odlukom se uređuje struktura prihoda i primitaka, te rashoda i izdataka Finansijskog plana Federalnog zavoda za zapošljavanje za 2016. godinu i procjene plana za 2017. i 2018. godinu (u daljem tekstu: Finansijski plan) i njegovo izvršavanje, prioriteti plaćanja, obim zaduživanja i izdavanja garancija, upravljanja dugom, te finansijskom i nefinansijskom imovinom, ovlaštenja Upravnog odbora i direktora, kazne za neispunjenje obaveza i druga pitanja u izvršavanju Finansijskog plana.

**Član 2.**

Finansijski plan je akt koji donosi Upravni odbor Federalnog zavoda za zapošljavanje (u daljem tekst:u Federalni zavod), a kojim se utvrđuje plan finansijskih aktivnosti iskazanih kroz projekciju godišnjih prihoda i primitaka, utvrđenih iznosa rashoda, izdataka i finansiranja.

Parlament Federacije BiH daje saglasnost na Finansijski plan.

**II – Struktura prihoda i primitaka, te rashoda i izdataka**

**Član 3.**

Finansijski plan se sastoji od općeg i posebnog dijela.

Opći dio Finansijskog plana čini račun prihoda i primitaka, rashoda, izdataka, te finansiranja. U računu prihoda i rashoda iskazuju se porezni i neporezni prihodi i drugi prihodi i primici, te rashodi i izdaci utvrđeni za finansiranje poslovanja Federalnog zavoda na osnovu zakona i drugih propisa.

Posebni dio Finansijskog plana sastoji se od plana rashoda i izdataka, razrade ukupnih izdataka po ekonomskoj klasifikaciji za 2016. godinu, programskim aktivnostima sa pripadajućim projektima, te plana realizacije kapitalnih izdataka.

#### **Član 4.**

Račun prihoda i rashoda sastoji se od:

1) Prihoda:

- doprinosa za osiguranje od nezaposlenosti koje uplaćuju poslodavci i zaposlenici, u skladu sa zakonom;
- kamata ili prihoda od uloga, kamata na depozit, kamata po datim plasmanima, ostalih kamata, radnih dozvola i drugih uplata;
- prihoda od pokretne ili nepokretne imovine koju Federalni zavod kupi ili stekne, u skladu sa zakonom;
- primljenih grantova i kapitalnih primitaka.

2) Rashoda:

- rashoda za plaće, naknade i doprinose;
- izdataka za materijal i usluge;
- tekućih grantova;
- kapitalnih izdataka.

### **III – Izvršavanje Finansijskog plana**

#### **Član 5.**

Federalni zavod može odobrena sredstva koristiti samo na način, u visini i za namjenu utvrđenu Finansijskim planom i ovom odlukom.

#### **Član 6.**

Finansijski plan se izvršava na osnovu planirane dinamike realizacije programskih aktivnosti, a u skladu sa raspoloživim sredstvima. Pri ugovaranju obaveza nužno se vodi računa o projektovanoj dinamici priliva i odliva sredstava i vrši se usklađivanje plaćanja sa planovima izvršavanja Finansijskog plana.

Finansijski plan se izvršava na način propisan Zakonom o posredovanju u zapošljavanju i socijalnoj sigurnosti nezaposlenih osoba („Službene novine Federacije BiH“, br. 55/00, 41/01, 22/05 i 9/08) po sljedećim prioritetima:

- 1) administrativni troškovi;
- 2) ostvarivanje materijalne i socijalne sigurnosti nezaposlenih osoba i za realizaciju programa za socijalno zbrinjavanje nezaposlenih osoba osiguravanjem nedostajućih sredstava;
- 3) mjere za promicanje ostvarivanja i održavanja više stope zaposlenosti i poboljšanje strukture zaposlenih;
- 4) kapitalni izdaci.

## **Član 7.**

Upravni odbor Federalnog zavoda jednom kvartalno, na prijedlog direktora, može donijeti odluku o prestrukturiranju rashoda i izdataka u okviru ukupnog odobrenog iznosa, a najviše do 10% ukupno odobrenih rashoda i izdataka prema Finansijskom planu.

Prestrukturiranje rashoda i izdataka može se vršiti na pozicijama 611000, 612000, 613000 i 820000, a na poziciji 614000 prestrukturiranje rashoda može se vršiti samo u okviru ove pozicije.

## **Član 8.**

Svi porezni prihodi, odnosno prihodi od doprinosa za osiguranje od nezaposlenosti i prihodi od izdavanja radnih dozvola se prikupljaju putem depozitnog računa, koji je pod isključivom nadležnošću Federalnog zavoda, u skladu sa Zakonom o trezoru u Federaciji Bosne i Hercegovine („Službene novine Federacije BiH”, br. 58/02, 19/03 i 79/07).

## **Član 9.**

Sredstva utvrđena Finansijskim planom na pozicijama „Plaće i naknade troškova zaposlenih”, „Doprinosi na teret poslodavca” i „Izdaci za rad Upravnog odbora i Savjetodavne komisije” osiguravaju se i realizuju u skladu sa zakonima, Kolektivnim ugovorom, podzakonskim i internim aktima Federalnog zavoda.

## **Član 10.**

Postupak nabavke robe, radova i usluga vrši se u skladu sa Zakonom o javnim nabavkama Bosne i Hercegovine („Službeni glasnik BiH”, broj 39/14).

## **Član 11.**

Sredstva utvrđena Finansijskim planom na poziciji „Sredstva za ostvarivanje materijalne i socijalne sigurnosti i za realizaciju Programa mjera za socijalno zbrinjavanje nezaposlenih osoba” realizuju se uz odobrenje resornog ministarstva, a u skladu sa Zakonom o posredovanju u zapošljavanju i socijalnoj sigurnosti nezaposlenih osoba, Programom mjera za socijalno zbrinjavanje nezaposlenih osoba koje su u procesu stečaja, likvidacije, restrukturiranja i privatizacije poduzeća ostale ili ostaju bez posla („Službene novine Federacije BiH”, broj 5/07).

## **Član 12.**

Sredstva utvrđena Finansijskim planom na poziciji „Sredstva za Fond za profesionalnu rehabilitaciju, osposobljavanje i zapošljavanje osoba sa invaliditetom” realizuju se u skladu sa Zakonom o profesionalnoj rehabilitaciji, osposobljavanju i zapošljavanju osoba sa invaliditetom („Službene novine Federacije BiH”, broj 9/10).

### **Član 13.**

Sredstva utvrđena Finansijskim planom na poziciji „Program sufinansiranja zapošljavanja i samozapošljavanja i pripreme za rad“ realizuju se u skladu sa odlukama Upravnog odbora Federalnog zavoda usklađenim sa Programom rada Federalnog zavoda i uskladu sa zaključenim ugovorima.

U okviru ove pozicije sredstva planirana za „Program zapošljavanja Roma“ realizuju se u skladu sa Memorandumom o razumijevanju o implementaciji Akcionog plana Bosne i Hercegovine za rješavanje problema Roma u oblasti zapošljavanja i u skladu sa pojedinačnim programom koji donosi Upravni odbor Federalnog zavoda, a usklađenog sa Programom rada Federalnog zavoda.

Dodatno u okviru ove pozicije, sredstva planirana za zapošljavanje i samozapošljavanje u poljoprivredi realizuju se u skladu sa Odlukom Upravnog odbora i Sporazumom Federalnog ministarstva poljoprivrede, vodoprivrede i šumarstva i Federalnog zavoda.

### **Član 14.**

Sredstva utvrđena Finansijskim planom na poziciji „Zajednički projekti sa drugim institucijama“ realizuju se u skladu sa odlukom Upravnog odbora Federalnog zavoda usklađenom sa Programom rada Federalnog zavoda, pojedinačnim odlukama Upravnog odbora i memorandumima i sporazumima potpisanim sa poslovnim partnerima.

### **Član 15.**

Sredstva utvrđena Finansijskim planom na poziciji „Analiza tržišta rada“ realizuju se u skladu sa odlukom Upravnog odbora Federalnog zavoda usklađenom sa Programom rada Federalnog zavoda.

### **Član 16.**

Sredstva utvrđena Finansijskim planom na poziciji „Profesionalna orijentacija (profesionalno informisanje, obuke za aktivno traženje posla i dr.)“ realizuju se u skladu sa pojedinačnim programom koji donosi Upravni odbor Federalnog zavoda, a usklađenim sa Programom rada Federalnog zavoda.

### **Član 17.**

Platne transakcije se obavljaju preko transakcijskih računa.

Potpisnik naloga platnih transakcija putem računa iz stava 1. ovog člana je direktor Federalnog zavoda ili druga osoba po njegovom ovlaštenju.

## **IV – Zaduživanje i upravljanje dugom**

### **Član 18.**

Federalni zavod se može zadužiti i izdati garancije u svrhe, na način, pod uslovom i u obimu propisanim zakonom kojim se uređuje dug, zaduživanje i garancije u Federaciji BiH.

## Član 19.

Finansijske obaveze preuzete u ime i za račun Federalnog zavoda predstavljaju dug i obaveze Federalnog zavoda.

## Član 20.

O visini zaduživanja i izdavanju garancija Federalnog zavoda odlučuje Parlament Federacije BiH na prijedlog Upravnog odbora Federalnog zavoda i Vlade Federacije BiH.

## Član 21.

Finansijskim planom nije predviđeno zaduživanje i izdavanje garancija, te se, s tim u vezi, ne utvrđuje iznos gornje granice zaduživanja, kao ni obaveze iz osnova tekućih otplata duga Federalnog zavoda.

## V – Kaznene odredbe

### Član 22.

Odgovorno lice Federalnog zavoda će se kazniti za prekršaj koji napravi u skladu sa odredbama čl. 102. i 103. Zakona o budžetima u Federaciji BiH.

## VI – Prelazne i završne odredbe

### Član 23.

U slučaju da drugi propisi sadrže odredbe o načinu izvršavanja Finansijskog plana, pravima i obavezama koje su u suprotnosti sa ovom odlukom, primjenjivat će se odredbe ove odluke.

### Član 24.

Na sva pitanja koja nisu regulisana ovom odlukom a tiču se izvršavanja, računovodstva i revizije, primjenjivat će se odredbe važećih zakona i podzakonskih akata.

### Član 25.

Ova odluka stupa na snagu danom dobijanja saglasnosti Parlamenta Federacije BiH, a primjenjuje se u godini za koju je donesena.

Broj: 01/1-14-8515/15  
Datum: 12.10.2015. godine

Po Ovlaštenju predsjednice  
Upravnog odbora Marijane Milinović  
broj: 03-49-6192/15 od 20.08.2015. godine

Rada Lukić

